

MALAYSIA
DEWAN NEGARA
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 10 JULAI 2012, PUKUL 10.00 PAGI

Bil. 13

PERTANYAAN-PERTANYAAN BAGI JAWAB LISAN

1. PN-1252-L15151
Dato' Boon Som a/l Inong minta **MENTERI KEWANGAN** menyatakan apakah langkah-langkah yang akan diambil oleh Kerajaan untuk melindungi ekonomi negara daripada kesan impak krisis eurozone. Bagaimanakah Kerajaan ingin memberangsangkan ekonomi tempatan dalam jangka pendek dan panjang.
2. PN-1252-L14952
Tuan Khoo Soo Seang minta **PERDANA MENTERI** menyatakan bagaimana pindaan kepada Akta Keterangan 1950 akan berfungsi berkenaan dengan media sosial seperti Facebook dan Twitter. Adakah perkongsian berita melalui saluran media ini juga menjadikan pengguna tersebut bertanggungjawab di bawah akta ini.
3. PN-1252-L15074
Puan Hajah Rohani binti Abdullah minta **MENTERI PERTAHANAN** menyatakan langkah-langkah Kementerian dalam membela nasib dan kebajikan anggota tentera yang telah bersara dari perkhidmatan kurang 21 tahun dan sejauh manakah kursus pra persaraan mendapat sambutan daripada anggota-anggota berkenaan.
4. PN-1252-L14777
Tuan Haji Ahamat @ Ahamad bin Yusop minta **MENTERI TENAGA, TEKNOLOGI HIJAU DAN AIR** menyatakan laporan media bahawa jika tiada kata sepakat antara Kerajaan Pusat dan Negeri berkaitan isu air, akan berlaku krisis air yang teruk di Lembah Klang menjelang tahun 2014 dan melibatkan jutaan penduduk.
5. PN-1252-L14900
Tuan Syed Shahir bin Syed Mohamud minta **MENTERI SUMBER MANUSIA** menyatakan mengenai tahap penguatkuasaan dan pelaksanaan Perintah-Perintah yang diputuskan oleh Mahkamah Buruh di seluruh negara sejak tahun 1997.

6. PN-1252-L15246
Datuk Paul Kong Sing Chu minta **MENTERI KERJA RAYA** menyatakan berapakah jumlah keseluruhan jarak jalan yang telah diturap di Sabah, Sarawak dan Semenanjung Malaysia sekarang ini. Apakah status terkini Lebuhraya Pan Borneo yang telah lama dirancang tetapi masih tertangguh hingga kini. Apakah sebab kelewatan pelaksanaannya.
7. PN-1252-L14767
Tuan Haji Abdul Shukor bin Mohd Sultan minta **PERDANA MENTERI** menyatakan langkah-langkah Kementerian memperbanyak aktiviti surau dan masjid di seluruh negara di samping memantau aktiviti dan program agar ianya benar-benar memberi manfaat kepada masyarakat dan tidak disalahgunakan oleh golongan berkepentingan sempit.
8. PN-1252-L15161
Puan S. Bagiam a/p Ayem Perumal minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan jumlah KR1M yang beroperasi keseluruhan sehingga kini dan apakah pecahan kaum yang diberikan lesen perniagaan KR1M mengikut negeri.
9. PN-1252-L15106
Dato' Muhammad Olian b Abdullah minta **MENTERI KEMAJUAN LUAR BANDAR DAN WILAYAH** menyatakan perancangan dan kemajuan pewartaan tanah Orang Asli sehingga kini mengikut negeri.
10. PN-1252-L14801
Datuk Chin Su Phin minta **MENTERI PERDAGANGAN ANTARABANGSA DAN INDUSTRI** menyatakan adakah Kementerian bercadang untuk mengkaji semula Dasar Automatif Negara (DAN) agar dapat bersaing semula dengan negara-negara ASEAN yang lain sekaligus dapat melonjakkan kembali Malaysia sebagai hub pengeluaran kenderaan di ASEAN.
11. PN-1252-L15338
Puan Roslin binti Haji Abdul Rahman minta **MENTERI KEWANGAN** menyatakan Menteri Kewangan Kedua ada berkata Kerajaan bercadang menjual beberapa tanah miliknya kepada pihak swasta untuk mengumpulkan dana bagi tujuan pembangunan ekonomi. Adakah pihak Kementerian menyenaraikan lokasi tanah tersebut bagi tatapan umum dan adakah penjualan tanah milik kerajaan itu dibuat secara tender terbuka atau secara tertutup.
12. PN-1252-L15282
Datuk Raja Ropiaah binti Raja Abdullah minta **MENTERI BELIA DAN SUKAN** menyatakan apakah langkah-langkah yang telah dan akan diambil bagi mengekalkan pencapaian cemerlang mutu sukan negara dalam beberapa bidang sukan seperti badminton, hoki dan lumba basikal. Apakah lagi bidang sukan tumpuan negara yang giat diusahakan sekarang dan perancangan untuk meraih kemenangan di peringkat antarabangsa.

13. PN-1252-L14988

Dr. S. Ramakrishnan minta **MENTERI PELANCONGAN** menyatakan apakah langkah-langkah Kementerian untuk menggalak dan menambahkan perbelanjaan pelancong asing di negara kita yang dilaporkan sangat kurang berbanding dengan negara-negara jiran.

14. PN-1252-L14937

Dato' Lim Nget Yoon minta **PERDANA MENTERI** menyatakan terdapat pemandu-pemandu teksi yang mengambil tambang yang amat tinggi daripada pelancong-pelancong asing. Bagaimanakah Kerajaan bercadang untuk menghapuskan perbuatan ini.

15. PN-1252-L14923

Tuan Baharudin bin Abu Bakar minta **MENTERI WILAYAH PERSEKUTUAN DAN KESEJAHTERAAN BANDAR** menyatakan tindakan segelintir peniaga warga asing yang bebas bermiaga tanpa lesen di sekitar Kuala Lumpur dan mengapa tiada tindakan untuk menghalang mereka diambil memandangkan ia boleh menjadikan peniaga rakyat tempatan.

16. PN-1252-L14877

Puan Hajah Noriah binti Mahat minta **MENTERI KESIHATAN** menyatakan apakah langkah-langkah yang diambil oleh Kementerian bagi memperhebatkan penyelaras dan penyepadan aktiviti promosi jenama Malaysia Healthcare di peringkat global bagi menggalakkan peningkatan pelancongan kesihatan di negara ini.

17. PN-1252-L15297

Datuk Maijol bin Mahap minta **PERDANA MENTERI** menyatakan adakah Kerajaan telah membuat kajian tentang paras pendapatan bagi setiap kaum dan suku kaum di negara ini supaya Kerajaan mempunyai maklumat dan data dalam usahanya untuk membasmi kemiskinan.

18. PN-1252-L15030

Tuan Pau Chiong Ung minta **MENTERI PENGANGKUTAN** menyatakan:-

- (a) berapakah kes kenderaan buatan tempatan yang terbakar secara tiba-tiba yang telah berlaku di negara kita dalam tempoh masa lima tahun yang lepas; dan
- (b) apakah sebab-sebab keadaan ini berlaku dan apakah mekanisme yang telah atau akan dilaksanakan untuk mengenal pasti kenderaan baru itu berada dalam keadaan yang sempurna sebelum keluar dari kilang dan dijual di pasaran.

19. PN-1252-L15063
Puan Hajah Mariany binti Mohammad Yit minta **MENTERI KEWANGAN** menyatakan penjelasan ke atas kesan dan implikasi ke atas kompleks dan rintihan pengedar-pengedar kereta baru dan terpakai apabila Bank Negara menguatkuasakan prosedur pinjaman dan sewa beli yang lebih ketat ke atas bakal pembeli yang mana penguatkuasaan prosedur yang lebih ketat ini menyebabkan industri automotif mendapat kesan yang besar dan menyebabkan pekerja-pekerja di sektor ini tergugat.
20. PN-1252-L14857
Tuan Chiew Lian Keng minta **MENTERI WILAYAH PERSEKUTUAN DAN KESEJAHTERAAN BANDAR** menyatakan sama ada Dewan Bandaraya Kuala Lumpur mengetahui bahawa mereka yang mengutip caj letak kereta di tepi jalan dan tanah-tanah kosong di ibu kota semakin serius dan mengapa tindakan tidak diambil terhadap mereka yang berbuat demikian tanpa sebarang kelulusan.
21. PN-1252-L15149
Datuk Kadzim M. Yahya minta **MENTERI TENAGA, TEKNOLOGI HIJAU DAN AIR** menyatakan statistik kekerapan gangguan bekalan elektrik di seluruh Sabah sejak 12 bulan yang lalu. Apakah sebab-sebab utama yang menjadi punca kepada gangguan elektrik di Sabah ini dan apakah langkah-langkah yang telah diambil oleh SESB untuk mengatasi gangguan bekalan elektrik yang seakan menjadi lumrah di Sabah.
22. PN-1252-L14929
Dato' Lim Nget Yoon minta **MENTERI PELAJARAN** menyatakan bilangan pelajar yang memasuki Kolej Matrikulasi Kementerian Pelajaran Malaysia dalam tahun 2011 mengikut kaum di Semenanjung Malaysia.
23. PN-1252-L14906
Puan Norliza binti Abdul Rahim minta **MENTERI KEWANGAN** menyatakan berapa peratuskah rakyat Malaysia yang mempunyai perlindungan insurans melalui *bancassurance*.
24. PN-1252-L15167
Puan S. Bagiam a/p Ayem Perumal minta **MENTERI DALAM NEGERI** menyatakan apakah jumlah keseluruhan kes-kes yang berkenaan dengan gejala gengsterisme di negara ini serta berikan pecahan jumlah kes mengikut kaum yang melibatkan gejala ini.
25. PN-1252-L15054
Puan Hajah Mariany binti Mohammad Yit minta **PERDANA MENTERI** menyatakan apakah akan ada semakan ke atas Skim Perkhidmatan Pensyarah, Pegawai Latihan Vokasional dan Pensyarah Politeknik dari segi kenaikan pangkat secara *time-based* yang mana pada ketika ini hanya Skim Perkhidmatan Pendidikan Siswazah yang mengajar di sekolah-sekolah Kerajaan sahaja diberikan kelulusan untuk menikmati kenaikan skim 8-8-6-3 (dari Gred 41 hingga 54).

26. PN-1252-L15096
Tuan Subramaniam a/l Veruthasalam minta **MENTERI KEWANGAN** menyatakan jika bank-bank di Malaysia menerima cek yang ditulis dalam Bahasa Tamil, dan jika tidak, mengapa dan jika ini boleh diimplementasikan dalam jangka masa terdekat.
27. PN-1252-L14813
Dato' Syed Ibrahim bin Kader minta **PERDANA MENTERI** menyatakan hampir kesemua soalan yang dikemukakan oleh Ahli Parlimen dijawab oleh Kementerian yang berkaitan akan tetapi ada maklumat yang dipanjangkan kepada agensi dan jabatan peringkat negeri Kementerian terbabit untuk di implementasi. Apakah langkah-langkah yang diambil oleh Kerajaan untuk memastikan maklumat yang diberi sampai ke semua peringkat.
28. PN-1252-L14969
Dato' Dr. Johari bin Mat minta **MENTERI PEMBANGUNAN WANITA, KELUARGA DAN MASYARAKAT** menyatakan apakah transformasi yang dilakukan oleh Kementerian bagi meningkatkan sistem penyampaian terutamanya di Jabatan Kebajikan Masyarakat serta agensi lain dalam Kementerian bagi memastikan perkhidmatan yang cekap dan efisien serta bantuan yang disediakan oleh Kementerian dinikmati dan sampai kepada oleh golongan sasar.
29. PN-1252-L15007
Dato' Haji Abdul Rahman bin Bakar minta **PERDANA MENTERI** menyatakan:-
(a) adakah Kerajaan mempunyai cadangan untuk mewujudkan satu badan baru menggantikan Majlis Peguam Malaysia; dan
(b) apakah setakat ini Kerajaan berpuas hati dengan peranan yang dimainkan oleh Majlis Peguam Malaysia sedangkan organisasi ini dilihat sebagai alat kepada parti politik.
30. PN-1252-L14958
Tuan Khoo Soo Seang minta **MENTERI DALAM NEGERI** menyatakan langkah-langkah yang lazim diambil oleh pihak polis untuk menyiasat kes-kes ragut memandangkan bahawa kebanyakan mangsa ragut tidak dapat mengecam penjenayah-penjenayah yang berkenaan.
31. PN-1252-L15038
Tuan Mohd. Khalid bin Ahmad minta **PERDANA MENTERI** menyatakan bilangan pesara Kerajaan yang terkini yang mendapat saraan kurang daripada RM1500 sebulan dan adakah Kerajaan bercadang untuk memberi kenaikan kepada pesara-pesara tersebut.
32. PN-1252-L14771
Tuan Haji Ahamat @ Ahamad bin Yusop minta **MENTERI PERUMAHAN DAN KERAJAAN TEMPATAN** menyatakan adakah Kementerian bercadang melakukan transformasi dalam usaha meningkatkan keberkesanannya operasi Pihak Berkuasa Tempatan (PBT) bagi memastikan ia memenuhi aspirasi rakyat.

33. PN-1252-L14755
Tuan Haji Abdul Shukor bin Mohd Sultan minta **PERDANA MENTERI** menyatakan:-
- (a) cabaran utama pelan NCER dalam menangani isu pemilikan tanah persendirian bagi tujuan pertanian; dan
 - (b) kejayaan meningkatkan purata pendapatan petani sejajar dengan objektif untuk menghapuskan kemiskinan dan pertumbuhan ekonomi.
34. PN-1252-L14783
Tuan Haji Ahamat @ Ahamad bin Yusop minta **MENTERI KEWANGAN** menyatakan sejauh mana Kerajaan dan Bank Negara Malaysia (BNM) melihat isu kebocoran kerahsiaan akaun pelanggan sebagai suatu jenayah yang serius selaras dengan Akta Perbankan dan Institusi kewangan 1989 (BAFIA).
35. PN-1252-L15264
Datuk Haji Yunus bin Haji Kurus minta **PERDANA MENTERI** menyatakan sama ada Wilayah Persekutuan Labuan telah dimasukkan dalam Suruhanjaya Siasatan Diraja (RCI) yang ditubuhkan kerana masalah di Labuan adalah sama seperti masalah yang berlaku di Sabah.
36. PN-1252-L14795
Datuk Chin Su Phin minta **MENTERI PELAJARAN** menyatakan mengapakah projek-projek yang membabitkan pihak Kementerian dilihat menghadapi pelbagai masalah di Sabah dan dimaklumkan bahawa masalah ini telah berlarutan sejak sekian lama dan apakah tindakan pihak Kementerian.
37. PN-1252-L15211
Dato' Dr. Firdaus bin Haji Abdullah minta **MENTERI KEWANGAN** menyatakan jumlah wang yang dibelanjakan oleh Syarikat-syarikat Milik Kerajaan (GLC's) khususnya PETRONAS, Maybank, TNB, Telekom dan lain-lain untuk mengiklankan syarikat-syarikat berkenaan dan produknya dalam media cetak berbahasa Melayu, Inggeris, Cina dan Tamil sepanjang lima tahun yang lalu. Selain daripada arahan seperti dijanjikan oleh Timbalan Menteri dalam sidang Dewan Negara bulan April 2012 yang lalu, apakah langkah-langkah Kerajaan (Kementerian-kementerian yang lain) untuk memastikan bahawa media cetak berbahasa kebangsaan mendapat langganan iklan yang lebih besar daripada semua syarikat perniagaan sama ada milik Kerajaan atau swasta.
38. PN-1252-L14836
Tuan Haji Muhamad Yusof bin Husin minta **MENTERI PERTANIAN DAN INDUSTRI ASAS TANI** menyatakan keluasan tanah sawah jerlus dalam kawasan MADA dan apakah langkah-langkah yang dilakukan untuk baik pulih sawah berkenaan dan berapa ramai petani yang mengalami kerugian disebabkan keadaan tersebut.

39. PN-1252-L14761
Tuan Haji Abdul Shukor bin Mohd Sultan minta **PERDANA MENTERI** menyatakan apakah peranan Kementerian dalam usaha mengekang ideologi songsang terutamanya penyebaran fahaman LGBT daripada terus meracuni pemikiran rakyat serta bertentangan dengan kedudukan negara sebagai negara Islam.
40. PN-1252-L15176
Dato' Boon Som a/l Inong minta **MENTERI KEWANGAN** menyatakan adakah syarikat yang dimiliki oleh rakyat Malaysia berketurunan Siam diiktiraf sebagai syarikat Bumiputera serta mendaftarkan syarikat mereka di Kementerian Kewangan dan memiliki saham yang diperuntukkan kepada kaum Bumiputera di Bursa Malaysia.
41. PN-1252-L14830
Tuan Haji Muhamad Yusof bin Husin minta **MENTERI KESIHATAN** menyatakan sehingga 30 Jun 2012, berapa ramaikah dan peratus rakyat Malaysia yang dikesan menghidap diabetes dan adakah benar Malaysia menduduki tempat pertama di rantau Asia dan ke 10 dunia selepas Asia Barat dan Kepulauan Pasifik. Jika benar, berikan sebab-sebabnya dan apakah langkah-langkah untuk mengatasinya.
42. PN-1252-L15241
Datuk Hj Saat bin Hj Abu minta **MENTERI KEWANGAN** menyatakan arahan supaya Syarikat-syarikat Berkaitan Kerajaan (GLC's) supaya mengambil langkah-langkah drastik melantik dan membimbing syarikat-syarikat Bumiputera dan terus diberi peluang-peluang berkaitan projek-projek yang diberi kepada syarikat GLC's, dengan cara ini syarikat-syarikat Bumiputera tidak akan bergantung sangat dengan tender Kerajaan.
43. PN-1252-L14881
Dato' Nalla K. S. minta **PERDANA MENTERI** menyatakan untuk mengkaji semula pemberian jumlah hari cuti am sempena perayaan Hari Deepavali dan Hari Krismas dengan memberi dua hari cuti bagi memberi peluang kepada penyambut kedua-dua perayaan ini mendapat cuti perayaan yang lebih.
44. PN-1252-L15226
Dato' Mohammed Najeeb bin Abdullah minta **MENTERI KERJA RAYA** menyatakan tentang cadangan membina sebuah plaza tol baru di lebuh raya PLUS untuk keluar ke Seremban/Labu dan bilakah kerja pembinaan akan dimulakan. Apakah rancangan Kementerian untuk meningkatkan rangkaian dan connectivity lebuh raya LEKAS.
45. PN-1252-L14975
Dato' Dr. Johari bin Mat minta **PERDANA MENTERI** menyatakan apakah langkah-langkah yang diambil oleh Kementerian bagi mengurangkan kos penyelenggaraan teksi yang tinggi yang terpaksa ditanggung pemandu teksi di negara ini.

46. PN-1252-L15131
Dr. Syed Husin Ali minta **MENTERI KEWANGAN** menyatakan adakah matlamat yang ditetapkan kepada LHDN untuk meningkatkan jumlah kutipan cukai kepada RM30 bilion akan mempengaruhi kadar cukai semasa yang dikenakan kepada rakyat dan jika tidak, berikan unjuran-unjuran angka sebagai pembuktian.
47. PN-1252-L14750
Datuk Chiw Tiang Chai minta **PERDANA MENTERI** menyatakan tindakan yang bakal diambil terhadap penjawat-penjawat awam yang terbukti terbabit dengan perhimpunan haram Bersih 3.0 supaya ia menjadi tauladan kepada penjawat awam lain.
48. PN-1252-L15225
Dato' Mohammed Najeeb bin Abdullah minta **MENTERI KEWANGAN** menyatakan keberkesanan peranan yang telah dimainkan oleh MAVCAP sejak penubuhannya dalam usaha meningkatkan perkembangan syarikat-syarikat berasaskan teknologi. Apakah kemampuan kewangan MAVCAP sekarang ini dan apakah badan yang akan mentadbir urus MyCreative Venture Capital kelak.
49. PN-1252-L15332
Puan Roslin binti Haji Abdul Rahman minta **MENTERI BELIA DAN SUKAN** menyatakan tiadakah cadangan pihak IKBN untuk menerokai bidang kemahiran baru yang lebih tinggi yang lebih spesifik permintaannya, yang kini dimonopoli oleh tenaga kerja bukan warganegara Malaysia, seperti kerjaya sebagai juruselam di sektor Minyak dan Gas, jurureka barang kemas, anak kapal perikanan laut dalam dan lain-lain lagi.
50. PN-1252-L15190
Puan Chew Lee Giok minta **MENTERI KEWANGAN** menyatakan keberkesanan peruntukan untuk usahawan wanita kaum Cina yang dilaksanakan oleh *Malaysian Chinese Women Entrepreneurs Foundation*. Berapa jumlah peruntukan yang telah berjaya dipohon.
51. PN-1252-L15163
Dato' Boon Som a/l Inong minta **PERDANA MENTERI** menyatakan berapakah bilangan pelajar berketurunan Bumiputera Siam yang mendapat keputusan cemerlang dalam peperiksaan Sijil Pelajaran Malaysia yang mendapat serta menerima tawaran untuk melanjutkan pelajaran ke luar negara dalam tempoh lima tahun, mengikut bidang pengajian.
52. PN-1252-L15302
Datuk Raja Ropiaah binti Raja Abdullah minta **MENTERI KEWANGAN** menyatakan apakah perancangan perkembangan MAS apabila urusan perjanjian bersama AirAsia dibatalkan. Perancangan dahulu untuk menjadikan Malaysia sebagai Hub Kargo bagi rantau ini sudahkah tercapai dan kalau belum, apakah pelan tindakan.

53. PN-1252-L15013
Dato' Haji Abdul Rahman bin Bakar minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan:-
- berapakah jumlah harta intelek yang telah didaftar sejak sepuluh tahun lalu dan kategori pendaftaran; dan
 - apakah strategi pengurusan harta intelek yang dilaksanakan Kerajaan negara ke arah negara maju 2020.
54. PN-1252-L15019
Dato' Haji Abdul Rahman bin Bakar minta **MENTERI KEWANGAN** menyatakan berapakah jumlah cukai langsung dan tidak langsung terlebih bayar yang terkumpul sejak tahun 2000 dan apakah Kerajaan mempunyai mekanisme tersendiri untuk atasi masalah berkenaan yang setiap tahun berlaku.
55. PN-1252-L15075
Puan Hajah Rohani binti Abdullah minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan langkah-langkah Kementerian bagi membendung pembukaan *hyper market* yang berleluasa di bandar-bandar kecil dan telah secara langsung menjelaskan perniagaan kedai runcit kecil-kecilan khususnya peniaga runcit Bumiputera.
56. PN-1252-L15044
Tuan Mohd. Khalid bin Ahmad minta **MENTERI PERUMAHAN DAN KERAJAAN TEMPATAN** menyatakan status terkini pelaksanaan kaedah Bina Kemudian Jual (*Build-Then-Sell (BTS)*) projek-projek perumahan swasta dan apakah halangan-halangan utama untuk melaksanakan kaedah tersebut.
57. PN-1252-L14842
Tuan Haji Muhamad Yusof bin Husin minta **MENTERI DALAM NEGERI** menyatakan dalam tempoh 3 tahun ini berapa kes orang hilang dan bagaimanakah tindakan Kerajaan untuk membanteras kes orang hilang terutamanya kanak-kanak dan remaja yang semakin meningkat.
58. PN-1252-L15291
Datuk Maijol bin Mahap minta **MENTERI PELAJARAN** menyatakan tidakkah Kementerian membantu kaum-kaum di Sabah untuk mengajar bahasa ibunda mereka masing-masing kepada anak-anak mereka kerana kekayaan kepelbagaian bahasa di Malaysia adalah juga merupakan aset negara.
59. PN-1252-L14854
Dato' Jaspal Singh minta **PERDANA MENTERI** menyatakan mengenai syarat-syarat untuk seseorang layak membeli rumah di bawah Skim PR1MA dan setakat ini, berapa banyakkah Skim PR1MA telah dilancarkan serta jumlah pemohon yang telah layak. Berapa banyak skim yang sedang dirancang yang akan dilancarkan dalam jangka masa satu tahun yang akan datang.

60. PN-1252-L15184
Puan Chew Lee Giok minta **MENTERI SUMBER ASLI DAN ALAM SEKITAR** menyatakan proses perkembangan peminjaman sepasang panda oleh China kepada Malaysia.
61. PN-1252-L14744
Datuk Chiw Tiang Chai minta **MENTERI KEWANGAN** menyatakan apakah status pembangunan pengeluaran pesawat tanpa pemandu (Unmanned Aerial Vehicle - UAV) dan sejauh manakah kemajuan pembangunan teknologi tersebut setakat ini.
62. PN-1252-L15318
Tuan Lihan Jok minta **MENTERI PELAJARAN** menyatakan apakah usaha-usaha yang dilakukan oleh Kementerian untuk menangani masalah kekurangan bekalan air bersih ke sekolah-sekolah di luar bandar, contohnya di SK Long Bedian, Baram, Sarawak.
63. PN-1252-L15258
Datuk Paul Kong Sing Chu minta **PERDANA MENTERI** menyatakan bermula dari penubuhan Talent Corporation beberapa tahun yang lalu hingga sekarang, setakat manakah kejayaan yang dicapai dan berapakah bilangan "individu berbakat" yang telah kembali ke Malaysia di bawah usaha dan inisiatif Talent Corporation.
64. PN-1252-L14819
Dato' Syed Ibrahim bin Kader minta **MENTERI DALAM NEGERI** menyatakan kadar jenayah penculikan yang melibatkan ahli perniagaan, ahli politik dan warga asing ada menunjukkan peningkatan sejak kebelakangan ini. Apakah langkah-langkah yang diambil oleh Kerajaan bagi membendung gejala ini daripada terus berlaku. Berapakah nilai wang tebusan yang dibayar oleh keluarga mangsa bagi kes yang dilaporkan sejak tahun 2011 hingga kini.
65. PN-1252-L15270
Datuk Haji Yunus bin Haji Kurus minta **PERDANA MENTERI** menyatakan prestasi Talent Corp dalam hal ehwal menyediakan bakat yang mencukupi ke arah merealisasikan hasrat negara menuju Wawasan 2020 dan negara berpendapatan tinggi.
66. PN-1252-L15236
Datuk Hj Saat bin Hj Abu minta **MENTERI KESIHATAN** menyatakan kajian semula larangan-larangan tempat awam seperti di Lapangan Terbang KLIA dan kawasan-kawasan membeli belah, dengan mencadangkan supaya kawasan-kawasan ini disediakan kafe-kafe merokok supaya orang-orang yang merokok tidak menjadi orang kelas ke-2, mahupun orang asing atau rakyat negara ini.
67. PN-1252-L14856
Dato' Jaspal Singh minta **PERDANA MENTERI** menyatakan jumlah biasiswa yang telah diperuntukkan bagi pelajar cemerlang lepasan SPM dan STPM bagi tahun 2012. Setakat ini, apakah bilangan pelajar yang berjaya mendapat biasiswa bagi menuntut pelajarannya di luar negara dan di dalam negara mengikut kursus dan pecahan bangsa.

68. PN-1252-L15288
Datuk Raja Ropiaah binti Raja Abdullah minta **MENTERI KERJA RAYA** menyatakan mengapa kesesakan lalu lintas semakin meningkat dan apakah langkah-langkah dan perancangan yang diambil untuk mengurangkan kesesakan ini.
69. PN-1252-L15137
Dr. Syed Husin Ali minta **MENTERI PENGAJIAN TINGGI** menyatakan fenomena pembukaan IPTS yang di luar kawalan serta pengambilan pelajar yang terlalu banyak iaitu tiga kali setahun dan adakah dengan memberi kewenangan sebegini kepada IPTS, dapat memenuhi keperluan pasaran pekerjaan pakar di Malaysia.
70. PN-1252-L15101
Tuan Subramiam a/l Veruthasalam minta **MENTERI WILAYAH PERSEKUTUAN DAN KESEJAHTERAAN BANDAR** menyatakan pihak mana bertanggungjawab menyelenggarakan Little India di Brickfields yang baru sahaja dibina, kerana ia tidak diselenggarakan dengan betul, kebersihan kurang memuaskan dan landskap tidak diurus dengan sempurna.
71. PN-1252-L15252
Datuk Paul Kong Sing Chu minta **PERDANA MENTERI** menyatakan jumlah keseluruhan dan butiran mengenai komposisi kaum kakitangan awam di Malaysia. Nyatakan juga jumlah peratusan kakitangan awam di semua negara-negara ASEAN, United Kingdom, Amerika Syarikat, Brazil, Korea, Jepun, China, Perancis, German dan beberapa negara Afrika.
72. PN-1252-L15050
Tuan Mohd. Khalid bin Ahmad minta **MENTERI KEWANGAN** menyatakan apakah tindakan-tindakan yang telah diambil oleh Suruhanjaya Sekuriti terhadap skandal kewangan SJ Asset Management Sdn. Bhd. (SJAM) yang telah menyebabkan pelabur-pelabur telah kerugian jutaan Ringgit.
73. PN-1252-L15345
Tuan Saiful Izham bin Ramli minta **MENTERI PELAJARAN** menyatakan tentang sistem baru penilaian prestasi pelajar-pelajar Tingkatan 3 yang akan menggantikan PMR nanti, serta kesan pemansuhan PMR yang sudah lama dijadikan tanda aras pencapaian pelajar-pelajar tingkatan 3 di seluruh negara.
74. PN-1252-L14789
Datuk Chin Su Phin minta **MENTERI KEWANGAN** menyatakan adakah Kerajaan merasakan perlu untuk melakukan penstrukturkan semula terhadap cukai yang dikenakan terhadap kereta import di Malaysia dan berapakah jumlah kutipan cukai kereta import pada tahun 2011.
75. PN-1252-L15217
Dato' Dr. Firdaus bin Haji Abdullah minta **PERDANA MENTERI** menyatakan langkah-langkah yang diambil untuk meningkatkan kualiti (dari segi kandungan ceramah dan adab tertib berceramah) penceramah-penceramah agama terutama yang memberi ceramah-ceramah agama dalam masjid di serata negara.

76. PN-1252-L14884
Puan Hajah Noriah binti Mahat minta **MENTERI KESIHATAN** menyatakan jumlah kes HIV/AIDS yang melibatkan kanak-kanak dan wanita dan program-program kesedaran kesihatan dengan kerjasama NGO terutamanya di kawasan luar bandar.
77. PN-1252-L14994
Dr. S. Ramakrishnan minta **MENTERI KEWANGAN** menyatakan adakah Kerajaan akan mempertimbangkan untuk membenarkan syarikat bukan Bumiputera untuk menjadi pembekal (vendor) kepada jabatan atau agensi Kerajaan dan Syarikat-syarikat Berkaitan Kerajaan (GLCs).
78. PN-1252-L14911
Tuan Baharudin bin Abu Bakar minta **MENTERI KEMAJUAN LUAR BANDAR DAN WILAYAH** menyatakan adakah Kementerian mempunyai dana untuk membantu usahawan-usahawan SME di luar bandar untuk menyertai ekspo-ekspo dan seminar di luar negara bagi tujuan menembusi pasaran.
79. PN-1252-L15199
Puan Chew Lee Giok minta **MENTERI KESIHATAN** menyatakan apakah tindakan yang akan diambil oleh Kementerian untuk mengatasi masalah bunuh diri yang semakin meningkat.
80. PN-1252-L14946
Tuan Khoo Soo Seang minta **MENTERI KEWANGAN** menyatakan apakah sebabnya jurang kadar belian dan jualan forex oleh institusi-institusi kewangan begitu besar sehingga menjadikan amat mahal kepada para usahawan kecil dan sederhana yang terlibat dengan perdagangan antarabangsa.
81. PN-1252-L14982
Dr. S. Ramakrishnan minta **MENTERI PELAJARAN** menyatakan adakah Kementerian ada membuat apa-apa kajian mengapa ramai murid kaum Melayu yang belajar di Sekolah Jenis Kebangsaan Cina (SJKC). Dianggarkan 80,000 murid Melayu daripada 600,000 murid yang belajar di SJKC dan angka ini dilihat semakin meningkat.
82. PN-1252-L14807
Dato' Syed Ibrahim bin Kader minta **PERDANA MENTERI** menyatakan sejak kebelakangan ini ada parti politik yang mengeluarkan fatwa mereka sendiri serta mempersoalkan keputusan yang dibuat oleh Majlis Fatwa Kebangsaan. Apakah tindakan yang diambil oleh Kerajaan terhadap pihak yang menimbulkan kekeliruan di kalangan umat Islam.
83. PN-1252-L15073
Puan Hajah Rohani binti Abdullah minta **MENTERI PERTANIAN DAN INDUSTRI ASAS TANI** menyatakan bilangan rumah nelayan yang telah dibaik pulih mengikut negeri di bawah Skim Tabung Khas Perumahan Nelayan dan nyatakan langkah-langkah Kementerian bagi memastikan setiap nelayan memiliki rumah sendiri yang selesa untuk keluarga nelayan.

84. PN-1252-L15111

Dato' Muhammad Olian b Abdullah minta **MENTERI KEWANGAN** menyatakan jumlah permohonan yang berjaya memiliki Rumah Mesra Rakyat mengikut pecahan kaum serta apakah tindakan Kerajaan dalam memastikan faktor kenaikan harga bahan binaan ini tidak menjelaskan pembinaan rumah mesra rakyat.

85. PN-1252-L15125

Dr. Syed Husin Ali minta **PERDANA MENTERI** menyatakan nama hotel-hotel tempat penginapan beliau serta isteri semasa melawat London, New York, dan Washington baru-baru ini, dan berapakah bayaran sewa tiap-tiap malam bagi kesemua hotel tersebut.

86. PN-1252-L15351

Tuan Saiful Izham bin Ramli minta **MENTERI KEWANGAN** menyatakan peratusan permohonan bajet tambahan berbanding bajet tahunan yang sudah diluluskan sejak tahun 2000 serta sebab-sebab munasabah kenapakah Kerajaan setiap tahun terus konsisten membuat permohonan bajet tambahan di Parlimen sedangkan perancangan sebegitu sepatutnya sudah dibuat secara teliti dalam merangka bajet tahunan yang dibentangkan dan diluluskan di Parlimen.

ATURAN URUSAN MESYUARAT DAN USUL-USUL

1. (D.R. 27/2012) Rang Undang-undang Perbekalan Tambahan (2012) 2012 – **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”** (9 Julai, 2012)

[Menteri Kewangan]

2. (D.R. 25/2012) Rang Undang-undang Pelindung (Pindaan) 2012 **Bacaan Kali Yang Kedua**

[Menteri Perdagangan Antarabangsa dan Industri]

3. (D.R. 24/2012) Rang Undang-undang Perubatan (Pindaan) 2012 “

[Menteri Kesihatan]

4. (D.R. 19/2012) Rang Undang-undang Kualiti Alam Sekeliling (Pindaan) 2012 “

[Menteri Sumber Asli dan Alam Sekitar]

5. (D.R. 26/2012) Rang Undang-undang Umur Persaraan Minimum 2012 “

[Menteri Sumber Manusia]

6. (D.R. 29/2012) Rang Undang-undang Pengangkutan Jalan (Pindaan) 2012 “

[Menteri Pengangkutan]

7. (D.R. 28/2012) Rang Undang-undang Francais (Pindaan) 2012 “

[Menteri Perdagangan Dalam Negeri, Koperasi dan Kepenggunaan]

8. PN-1252-U15026
Dato' Haji Abdul Rahman bin Bakar akan mencadangkan:-

“Bahawa Dewan ini mendesak Kerajaan supaya mengambil pendekatan yang sesuai agar ajaran anutan Syiah tidak menular dan merebak di kalangan orang-orang Islam di negara kita kerana ada fakta menyebut terdapat 200 juta pengikut Syiah di seluruh dunia. Di negara kita, anutan Syiah sedang berkembang.

Tanpa mengambil suatu tindakan yang cekap dan berkesan oleh pihak Jabatan Perdana Menteri melalui JAKIM, penyebaran ajaran ini akan menyebabkan umat Islam negara kita yang mengamalkan ajaran Sunnah Waljamaah akan terpesong. Justeru, apakah usaha yang dilakukan JAKIM memadai selama ini dari segi penguatkuasaannya. Jika ya, nyatakan usaha berkenaan. Jika tidak, apakah Kerajaan merasakan perkara ini di dalam pemantuan dan tidak memudararatkan ummah Islam di Malaysia."

[Menteri di Jabatan Perdana Menteri]

9. PN-1252-U15027

Dato' Haji Abdul Rahman bin Bakar akan mencadangkan:-

"Bahawa Dewan ini menyarankan agar Kerajaan melaksanakan BR1M II seeloknya pada sebelum tahun baharu 2013 sebagai persiapan kepada persekolahan anak-anak dan sambutan tahun baru. Ini adalah usaha mapan Kerajaan ke arah membela nasib golongan yang berpendapatan kurang daripada RM3000 sebulan. Sesungguhnya, BR1M I telah memberi imbuhan langsung kepada masyarakat berpendapatan rendah dan rata-rata rakyat cukup berterima kasih kepada Kerajaan. Melihat kepada kesan daripada BR1M I, jika sesuai dan mempunyai kedudukan kewangan yang kukuh, adalah wajar BR1M II diberikan pada tahun ini atau awal tahun depan. Setelah BR1M I dilaksanakan, apakah tidak ada kesan kepada ekonomi negara sedangkan seluruh dunia sedang menghadapi kemelesetan ekonomi terutamanya di Amerika Syarikat dan beberapa Negara EU."

[Menteri Kewangan]

10. PN-1252-U15028

Dato' Haji Abdul Rahman bin Bakar akan mencadangkan:-

"Bahawa Dewan ini mendesak pihak-pihak berwajib supaya meneliti dan mengambil tindakan sewajarnya ke atas kebanjiran pelarian dari Myanmar yang mungkin lama kelamaan akan menyekat hak rakyat yang sah dan menjelaskan hubungan baik antara Negara. Bukan suatu rahsia lagi bahawa ramai orang-orang Islam yang terbunuh dan menjadi pelarian di Myanmar akibat pemerintahan junta sejak berpuluhan tahun lalu. Tidak kurang 1,500 orang Islam telah berhijrah ke negara-negara jiran termasuk Malaysia. Mereka hidup merempat dan tidak sempurna dan ada yang menjadi peminta sedekah demi untuk sesuap nasi. Ada juga yang bekerja dengan syarikat-syarikat swasta mengikut minat dan kemahiran masing-masing. Persoalannya, apakah tindakan pihak Kerajaan terhadap masalah ini kerana jika tidak dibendung akibatnya lama-kelamaan kita terpaksa pula melayan mereka sebagai warga negara kerana ada di kalangan mereka yang berkahwin dengan penduduk setempat. Selain itu, kita juga terpaksa bertimbang rasa terhadap anak-anak mereka yang dahagakan pelajaran. Kita terpaksa memberi ruang yang adil kepada anak-anak mereka kerana aspek pelajaran, kesihatan, agama dan perlindungan adalah sesuatu yang universal.

Justeru, saya memohon pihak-pihak berwajib supaya meneliti dan mengambil tindakan sewajarnya agar ianya tidak menjelaskan hubungan baik antara negara dan di masa sama tidak menjelaskan peluang rakyat tempatan yang sah dan yang hak."

[Menteri di Jabatan Perdana Menteri]

11. PN-1252-U15004

Dr. S. Ramakrishnan akan mencadangkan:-

"Bahawa Dewan ini mendesak agar pihak Kerajaan menggubal Undang-undang Kebebasan Maklumat bagi membolehkan rakyat Malaysia menikmati hak untuk mendapatkan maklumat selaras dengan kehendak prinsip-prinsip demokrasi. Hak rakyat untuk mendapatkan maklumat adalah penting bagi membolehkan rakyat untuk memeriksa dan membendung penyalahgunaan kuasa oleh kakitangan Kerajaan dalam hal-hal pentadbiran Kerajaan terutamanya keputusan-keputusan Kerajaan yang mempunyai implikasi secara langsung dan tidak langsung terhadap rakyat jelata. Oleh itu saya mengambil kesempatan melalui mesyuarat Dewan Negara ini untuk menampilkkan usul penggubalan undang-undang bagi tujuan membolehkan rakyat Malaysia untuk mengambil bahagian dalam pentadbiran dan hal-hal Kerajaan terutamanya dalam proses membuat keputusan-keputusan sejajar dengan prinsip demokrasi (*participatory democracy*) dan kepentingan awam (*public interest*). Rakyat Malaysia mengalu-alukan satu Kerajaan yang telus dan bertanggung jawab maka penggubalan undang-undang ini adalah mustahak. Undang-undang ini akan memberikan akses kepada dokumen-dokumen sesebuah agensi Kerajaan dan dokumen-dokumen rasmi Kementerian Kerajaan. Maka disarankan supaya Kerajaan mengambil serius penggubalan undang-undang ini dan mengambil segala langkah-langkah untuk merealisasikan undang-undang ini di Malaysia yang mana undang-undang begini telah pun di perkenalkan di negara-negara Komanwel yang lain.

[Menteri di Jabatan Perdana Menteri]

12. PN-1252-U15005

Dr. S. Ramakrishnan akan mencadangkan:-

"Bahawa Dewan ini mendesak agar pihak Kerajaan prihatin dan memandang serius terhadap penyalahgunaan minuman alkohol dan minuman keras di kalangan masyarakat kita, terutama di kalangan remaja bermula dari usia 16 tahun yang amat dibimbangi ia akan membawa padah kepada masa depan negara jika kita tidak mengambil tindakan yang sewajarnya secepat mungkin. Oleh itu, saya mengambil kesempatan melalui mesyuarat Dewan Negara ini untuk menampilkkan usul penggubalan undang-undang untuk menangani penyalahgunaan alkohol dan minuman keras di kalangan masyarakat kita dengan mengambil langkah-langkah berikut:-

- (i) Mengubah dan meningkatkan umur seseorang untuk membeli minuman keras dan alkohol secara sah dari segi undang-undang dari 18 tahun ke 21 tahun. Hukuman berat dan denda yang maksimum juga harus dikenakan terhadap sesiapa sahaja yang di bawah umur 21 tahun jika mereka didapati membeli minuman alkohol dan minuman keras.
- (ii) Memperkenalkan sistem lesen baru yang mengawal waktu penjualan alkohol dan minuman keras. Contohnya seperti mengehadkan waktu penjualan dari 11.00 pagi sehingga pukul 9.00 malam.
- (iii) Mempunyai undang-undang untuk menangani masalah-masalah pengambilan minuman-minuman keras dan alkohol di tempat awam dan menjadikan pengambilan minuman ini di tempat awam sebagai satu jenayah di mana boleh ditangkap dan didakwa di bawah kanun undang-undang.
- (iv) Memperketatkan lagi kanun undang-undang yang mengawal penjualan alkohol dan minuman keras oleh peniaga-peniaga kepada remaja dan juga pelajar-pelajar di bawah umur. Contohnya, apabila mana-mana peniaga menjual alkohol dan minuman keras kepada pelajar-pelajar dan remaja di bawah umur, lesen kedai peniaga itu haruslah ditarik dan dibatalkan dan mengenakan denda yang maksimum terhadap peniaga tersebut.
- (v) Memperkenalkan undang-undang baru untuk pendaftaran dan mengawal penjualan minuman-minuman keras buatan tempatan. Contohnya seperti samsu dan ia mendapat sambutan baik di kalangan masyarakat berpendapatan rendah, terutamanya di kalangan masyarakat India yang tinggal di estet, kerana harga minuman ini adalah sangat murah dan mudah didapati di kawasan pedalaman secara haram.
- (vi) Menubuhkan satu pusat pencegahan, penyelidikan, dan pemulihan alkohol Malaysia seperti di Amerika Syarikat dan Australia untuk mengadakan penyelidikan dari semasa ke semasa."

[Menteri Perumahan dan Kerajaan Tempatan]

**RISALAT-RISALAT YANG DIBAWA KE DALAM MESYUARAT
(DEWAN NEGARA)**

<u>TAHUN 2012</u>	<u>RISALAT/DOKUMEN</u>	<u>TARIKH DIBENTANGKAN</u>
ST.45	Laporan Tahunan dan Penyata Kewangan Lembaga Tabung Angkatan Tentera (LTAT) Bagi Tahun 2011	10 Julai 2012
ST.46	Laporan Tahunan dan Penyata Kewangan Perbadanan Perwira Harta Malaysia (PPHM) Bagi Tahun 2011	10 Julai 2012
ST.47	Laporan Tahunan dan Penyata Kewangan Perbadanan Perwira Niaga Malaysia (PERNAMA) Bagi Tahun 2011	10 Julai 2012
ST.48	Laporan Tahunan dan Penyata Kewangan Perbadanan Hal Ehwal Bekas Angkatan Tentera (PERHEBAT) Bagi Tahun 2011	10 Julai 2012
CMD.5	Laporan Tahunan Suruhanjaya Perkhidmatan Kehakiman dan Perundungan Malaysia Bagi Tahun 2011	10 Julai 2012

UCAPAN PENANGGUHAN

BIL.	TARIKH UCAPAN	AHLI YANG BERUCAP	TAJUK UCAPAN	MENTERI YANG BERTANGGUNGJAWAB
1.	10.7.2012 (Selasa)	Sen. Dr. S. Ramakrishnan	Dasar Ladang Kelapa Sawit Untuk Menyokong Penternakan	Menteri Pertanian dan Industri Asas Tani